

THE UNIVERSITY OF CHICAGO

CHICAGO, ILL.

欽定平定貴州苗匪紀略卷十五 乙丑年至丙寅年

九月二十三日 乙酉 李瀚章奏言苗匪竄逼晃沅

自經官軍擊退遁歸後山洞後復窺補楚軍防

黔之涼傘雪洞等營意圖內擾總兵周洪印豫

飭守備李茂昭帶隊馳往以爲涼雪聲援該逆

圍撲陽寨壘卡梗塞雪洞道路經駐防雪洞知

縣吳廷甲督軍與駐防涼傘守備楊昌松各出

隊伍分頭夾擊殺賊甚衆賊始退回高寨勾溪等處嗣於八月二十三日復糾大股竄撲涼傘防營楊昌松督隊擊斃賊無算該逆抵死不
退分擾涼防後路擄掠糧石爲長圍之計周洪
印聞信添派知州羅建章督帶四營由羊坪滾
營而進馳往救援當可解危惟賊情詭譎誠恐
潛竄全處彼地直通大河下達托口爲入楚門

戶已飭周洪印激勵諸將迅解涼雪之圍力勦
餘股勿令侵犯以固邊陲奏入得

旨涼傘雪洞等營被黔匪圍撲卽著嚴飭周洪印督率
各軍實力進勦痛殄逆氛以清邊境

十月初九日庚子勞崇光裕麟奏言八月初五十

三等日疊據署古州鎮總兵劉元勳署黎平府
知府徐達邦等稟報清江廳逆苗於六月二十

一日竄擾古州廳屬之普安純厚敦仁崇義寨等處經古州同知澤沾會同署朗洞營參將舒澤洛督團堵剿疊獲勝仗殲逆苗一百餘名該匪退踞高蒿地方徐達邦等正在籌防西路竄匪又據東北兩路探報鎮遠清江逆苗糾合寨頭悍匪分股而出一攻思州玉屏一由浦洞出天柱縣境竄入府屬順票寨攻破驗洞大卡焚

掠石行平秋九寨等處沿河三江一帶均爲震
動劉元勳等卽派署黎平營參將李秀祥等招
募勁練分投堵剿並飭委辦團務四川候補知
縣姜興國等督率練團憑河固守遏其內竄惟
該逆股數衆多其往攻思州玉屏股匪現已受
創而回與古州敗匪併趨黎平一路東西北三
面皆賊兵力甚形單薄劉元勳等一面就近赴

湖南廣西撫

臣

處具稟乞援一面稟請撥兵籌

餉前來

臣

等查黎平各屬地方均已糜爛惟郡

城一帶尙爲完區而環境皆係苗巢相距僅百

餘里該苗逆等來去飄忽防不勝防此次三路

出擾其意專注黎平自當迅圖撲滅以免燎原

第省中兵單餉匱自六月至今僅解到湘省捐

輸銀一萬兩涓滴所入莫補漏卮惟有飛飭該

文武就地添募勁勇由貴東道抽收釐金項下
酌支接濟並檄飭署貴東道趙崇慶暨咨湖南
廣西各撫臣一體就近撥兵援應以杜延蔓而
靖兇氛奏入

上命軍機大臣傳諭勞崇光張亮基李瀚章張凱嵩曰
貴州苗匪股數衆多現勾結古州敗匪並趨黎平一
路東西北三面皆賊官軍力薄恐成燎原之勢著張

亮基裕麟督飭署古州鎮署黎平府認真防守勿令
深入爲患一面就近添募勁練力圖剿洗仍催令趙
崇慶撥兵援應以遏兇鋒並著李瀚章張凱嵩就近
檄飭防邊將士出境會剿不得稍分畛域

二十一日壬子勞崇光裕麟奏言據署黎平府知

府徐達邦稟稱苗匪等竄至府屬東北兩路自
七月初一日攻陷驗洞後卽分紮大步河高

等處四出竄掠疊犯沿河營盤西路之匪盤踞
寨蒿地方於初三日分股攻陷育洞燒掠洋洞
進撲岑更蓋保各卡爲我軍所扼未能闖入遂
復回陽育洞郡城正在戒嚴適訪聞附近之張
寨冲難民劉洪等聚衆結盟暗勾苗逆約爲內
應徐達邦卽派守備宋聯科帶練圍捕殲斃匪
黨十三名生擒劉洪等十八名訊明正法一面

會同署古州鎮總兵劉元勳等激勵兵團分投
進剿初五日苗匪由文斗地方編筏渡河團首
姜興國等乘賊半渡以大礮轟擊斃賊數十人
該逆仍退回對岸分撲黃悶格翁康蹤并蹤各
隘經代理清江通判毛騫等督練擊退殲匪一
百餘名當將大步河高壩驗洞等處次第收復
初六日該逆又率黨攻撲桃子坳柳威卡經署

參將李秀祥等扼要堵擊圍首龍幸雲等由後抄截賊大奔潰竄往天柱縣屬之冷水漢寨旋於初八日橫竄閬松樂寨復經駐防楚軍開隊截剿殺賊二百餘名餘匪連夜竄歸幫洞賴洞老巢其西路育洞諸匪於初六日率黨攻撲貢寨高微兩坳營卡以圖深入圍首石湛華等探知設伏以待該逆等將至卡門伏兵突出槍礮

齊施團首吳鳳靈率練由後夾攻殲賊五六百名賊卽奪路狂奔不敢復回育洞均向受洞唐冷逃竄寨蒿股匪聞風震懾亦由唐冷而去等語臣等查此次逆苗傾巢而出分路攻撲並敢勾結內應意圖窺伺黎平府城該文武於兵單餉竭之時督率兵團將該逆剋期擊退辦理尙爲奮勉惟該逆於黎平一郡久已垂涎今雖受

創而回難保不乘虛復出惟有督飭該文武等
嚴守各隘加意防範並咨湖南廣西各撫臣轉
飭防邊諸軍隨時援應奏入

上命軍機大臣傳諭勞崇光張亮基李瀚章張凱嵩裕
麟曰貴州清江廳逆苗竄至黎平府屬東北兩路攻
陷驗洞後分紮大步洞等處西路之匪盤踞寨蒿地
方並分股竄歸青洞均爲官軍扼截未能闖入附近

之張寨沖復有難民劉洪等聚衆勾結苗逆約爲內
應經署知府徐達邦派官兵圍捕將劉洪等擒獲正
法復督飭兵練分股進剿斃賊甚多當將大步河等
處收復餘匪敗往天柱縣境亦經楚軍截剿竄歸幫
洞等老巢其西路育洞踞匪並經官兵設伏夾攻殲
斃多名餘黨均向唐冷逃竄防剿尙屬認真惟此股
逆苗傾巢出竄並敢勾結內應意圖窺伺黎平府城

蓄謀甚狡現雖被官軍擊退難保不乘隙復來著勞
崇光張亮基裕麟督飭該處文武嚴防各隘毋任匪
蹤紛竄並著李瀚章張凱嵩速飭沿邊防軍一律相
機援應毋稍疏虞

十一月十四日乙巳張亮基奏言六月二十日鎮

遠府屬逆苗大股突出由鋪田渡河闌入思州
府境縱火焚燒城外新街民房分股攻撲城垣